



Sud Bosne i Hercegovine
Sud Bosne i Hecegovine

Broj: S1 3 Iž 039440 21 Iž
Sarajevo, 08.01.2021.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Mirsade Džindo, predsjednik vijeća, Zvezdane Antonović i Vesne Trifunović, članovi vijeća, odlučujući o žalbi političkog subjekta HDZ BiH-Hrvatska demokratska zajednica BiH, sa sjedištem u Mostaru ulica Kneza Domagoja bb, kojeg zastupa predsjednik Dr. Dragan Čović, izjavljenoj protiv zaključka Centralne izborne komisije Bosne i Hercegovine broj: 05-1-07-5-2156-3/20 od 30.12.2020.godine, u nejavnoj sjednici, održanoj dana 08.01.2021.godine, donio je

R J E Š E N J E

Žalba se odbija kao neosnovana.

O b r a z l o ž e n j e

Zaključkom Centralne izborne komisije Bosne i Hercegovine, broj: 05-1-07-5-2156-3/20 od 30.12.2020.godine, odbačen je prigovor političkog subjekta HDZ BiH-Hrvatska demokratska zajednica BiH zbog nenadležnosti.

Protiv navedene odluke žalitelj je blagovremeno izjavio žalbu navodeći da je dana 20.12.2020.godine podnio prigovor CIK BiH u kojem je upozorio na povredu člana 3.5 stav 9. i člana 3.6 Izbornog zakona BiH. U prigovoru je posebno istaknuto da su organizirana skupina birača bošnjačke nacionalnosti sudionici protupravnog organizovanog preseljenja iz jedne izborne jedinice u drugu izbornu jedinicu s nedvosmislenom namjerom uticaja na izborni rezultat u izbornom području Jug, a što je predmet istrage po podnesenoj krivičnoj prijavi. Smatra da je pobijani zaključak CIK BiH donijela nepravilnom primjenom zakona i pogrešenim utvrđenjem činjeničnog stanja, a što potvrđuje član 2.9 tačka 4. i člana 3.6 Izbornog zakona BiH. Dalje navodi da je CIK BiH bila dužna da u skladu sa članom 3.5 stav 9. Izbornog zakona BiH po saznavaju učinjenim zloupotrebama prebivališta od nadležnih tijela koja vode službene evidencije o jedinstvenom matičnom broju, prebivalištu i boravištu državljana BiH, zatraži pristup i uvid u dokumente vezano za prijave i prebivališta. Predlaže da se žalba uvaži, poništi pobijani zaključak i predemt vrati CIK BiH na ponovni postupak.

Centralna izborna komisija Bosne i Hercegovine u odgovoru na žalbu je predložila se ista odbije kao neosnovana.

Žalba nije osnovana.

Prema shvatanju apelacionog vijeća, pobijani zaključak Centralne izborne komisije BiH (u daljem tekstu CIK BiH) broj: 05-1-07-2156-3/20 od 30.12.2020.godine kojimse odbacuje prigovor političkog subjekta HDZ BiH-Hrvatska demokratska zajednica BiH zbog nenadležnosti, je zasnovan na pravilnoj primjeni materijalnog prava, a razloge za donošenje iste u cjelosti prihvata i ovo vijeće.

Odredba člana 3.3 Izbornog zakona BiH(Sl.glasnik BiH broj 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 33/08, 37/08, 39/08, 32/10, 18/13, 7/14, 31/16 i 41/20) propisuje da se Centralni birački spisak sačinjava i vodi na osnovu podataka iz službenih evidencija o prebivalištu i boravištu državljana BiH koje vode nadležni državni organ, drugih javnih isprava i službenih evidencija o državljanima BiH koje vode CIK BiH i drugi nadležni organi i na osnovu javnih isprava i podataka koje dobiju neposredno od građana.

Odredbom člana 3.5 stav (2) Izbornog zakona Bosne i Hercegovine je propisano da Centralna izborna komisija BiH vodi Centralni birački spisak za teritoriju Bosne i Hercegovine na osnovu evidencije nadležnog državnog organa koji vodi registar građana Bosne i Hercegovine u skladu sa Zakonom o centralnoj evidenciji i razmjenu podataka, osim ako ovim Zakonom nije drugačije određeno.

Nadležna ministarstva unutrašnjih poslova u Bosni Hercegovine su organi koji vode evidencije o državljanima BiH u skladu s odredbama Zakona o jedinstvenom matičnom broju, Zakona o prebivalištu i boravištu državljana BiH i Zakona o ličnoj karti državljana BiH, što znači da vode i evidenciju o promjenama prebivališta i boravišta, koje na osnovu člana 3.5 stav (5) Izbornog zakona BiH su dužni da sve promjene koje utiču na ažurnost Centralnog biračkog spiska dostave Agenciji za identifikacione dokumente, evidenciju i razmjenu podataka Bosne i Hercegovinc (IDDEEA), organu koji tehnički održava evidenciju Centralnog biračkog spiska.

Shodno navedenom izvodi iz Centralnog biračkog spiska za glasanje na izborima se sačinjavaju, pored drugih zakonom propisanih uslova, na osnovu evidencija prebivališta državljana Bosne i Hercegovine koje vode nadležna ministarstva unutrašnjih poslova u Bosni i Hercegovine, koja su odgovorna za ažurnost i ispravnost navedene evidencije.

U konkretnom slučaju izvodi iz Centralnog biračkog spiska za glasanje na Lokalnim izborima 2020. godine su sačinjeni na osnovu evidencija prebivališta državljana Bosne i Hercegovine koje vodi Ministarstvo unutrašnjih poslova Hercegovačko-neretvanskog kantona.

Nema osnova žalbeni navod da je Centralna izborna komisija BiH po saznanju da su zloupotrebe prebivališta učinjene od nadležnih tijela koja vode službene evidencije o jedinstvenom matičnom broju, prebivalištu i boravištu državljana BiH, trebala zatraži pristup i uvid u dokumente vezano za prijave i prebivalište. Naime, odredbama Izbornog zakona BiH nije propisana nadležnost CIK BiH da preispituje rad ministarstava unutrašnjih poslova u Bosni i Hercegovini, kao i način vođenja prijave prebivališta i

promjena istih građana BiH. Ovu činjenicu potvrđuje i sama krivična prijava Hrvatskog narodnog sabora BiH broj: 1-22/20 od 19.12.2020.godine podnesena Kantonalnom tužilaštvu Hercegovačko-neretvanskog kantona Mostar, koji je jedini nadležni organ da izvrši provjere po sumnjama podnositelja žalbe, u konkretnom slučaju, na nezakonit rad ministarstva unutrašnjih poslova Hercegovačko-neretvanskog kantona, kao i da su se pojedini birači (većinom bošnjačke nacionalnosti) prijavili fiktivno na nove adrese stanovanja.

Imajući saznanje da je već podnesena krivična prijava, kako je navedeno u prigovoru podnositelja žalbe, Centralna izborna komisija Bosne i Hercegovine je pravilno donijela zaključak kojim odacuje žaliteljev prigovor zbog nenadležnosti.

Ovo vijeće posebno istće da su privremeni izvodi sačinjeni sa danom raspisivanja Lokalnih izbora 2020 godine u Gradu Mostaru prema podacima iz Centralnog biračkog spiska za birače koji glasaju u Mostaru, koji su dostavljeni putem e-maila Gradskoj izbornoj komisiji Mostar da ih izlože u skladu sa svojim planom izlaganja privremenih biračkih spiskova.

Nadalje, nakon usvajanja Zakona o izmjenama i dopunama Izbornog zakona Bosne i Hercegovine („Službeni glasnik BiH“, broj 41/20), u skladu sa odredbama Izbornog zakona Bosne i Hercegovine i podzakonskim aktima, posebno Pravilnikom o upotrebi i izradi izvoda iz Centralnog biračkog spiska („Službeni glasnik BiH“, br. 25/20 i 38/20) u propisanom roku, a po donošenju Odluke Centralne izborne komisije Bosne i Hercegovine o zaključivanju i potvrđivanju Centralnog biračkog spiska za Lokalne izbore 2020.godine u Gradu Mostaru i objavljivanju broja birača za gradsku izbornu jedinicu i izborne jedinice gradskog područja („Nadalje, nakon usvojenog Zakona o izmjenama i dopunama Izbornog zakona Službeni glasnik BiH“, broj 73/20), su i sačinjeni konačni izvodi iz Centralnog biračkog spiska za redovne birače prema specifičnostima organizacije izbornog procesa u Gradu Mostaru.

Iz stanja spisa proizlazi da je u cilju određivanja biračkih mjesta sa pridruženim pripadajućim ulicama prema izbornim jedinicama gradskih područja u Gradu Mostaru utvrđenim navedenim Zakonom o izmjenama i dopunama Izbornog zakona Bosne i Hercegovine, Centralna izborna komisija Bosne i Hercegovine je na prijedlog Gradske izborne komisije Mostar donijela zaključak broj: 05-1-02-2-660-5/20 od 24.07.2020.godine, kojim je za utvrđene izmjene u izbornim jedinicama u odnosu na ranije stanje, data saglasnost Agenciji za identifikacione dokumente, evidenciju i razmjenu podataka Bosne i Hercegovine (IDDEEA) da izvrši tehničke izmjene u aplikaciji „Pasivna registracija birača“.

Iz navedenih razloga apelaciono vijeće nalazi da je pobijani zaključak Centralne izborne komisije Bosne i Hercegovine pravilan i zakonit, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

PREDSJEDNIK VIJEĆA
S U D I J A
Mirsada Džindo